

建寧府志卷之一



建置沿革

閩本荒徼三代以前聲教未暨周時七閩雖入職方然以朝聘弗通故其建置沿革漫無可考逮秦罷侯置守始以其地為閩中郡建寔隸焉漢初郡廢至武帝則徙其民而墟之久而逃亡漸集生齒寢繁復立為冶縣統屬會稽南部三國孫吳時廼析為郡厥後或因或革代各不同爰加考據序列如左

建寧府志卷之一

一

葉安刊百九十二

周

屬七閩地

職方氏辨七閩之人閩之名始此

秦

屬閩中郡

勾踐裔亡諸氏姓騶據閩自王始皇廢亡諸為君長以其地為閩中郡

西漢

### 高帝屬閩越

先是亡諸及粵東海王搖歸番陽令吳芮從諸侯滅秦漢興佐漢擊楚五年立亡諸為閩越王王閩中故地都治惠帝三年舉高帝時粵功搖為東海王都東甌。治即今候官縣將軍山東甌即今浙江永嘉縣

### 武帝屬會稽郡

建元三年閩越發兵圍東甌請舉國徙江淮其地復屬閩越六年閩粵擊南粵南粵請救天子閩粵王郢發兵距險其弟餘善謀殺王降立無諸孫繇君丑為越繇王奉閩越祀餘善以殺郢功立為東越王與繇王並處故又名東越元鼎五年餘善反漢擊之元封元年繇王居股殺餘善以降封居股為東成侯帝以閩越悍數反覆詔軍吏皆將其民徙江淮間盡虛其地後有逃遁山谷者頗出立為冶縣屬會稽郡又名其地為東冶縣

### 東漢

### 光武屬會稽南部都尉

帝初改冶縣為候官都尉屬會稽郡後分冶縣為東南二部都尉閩為南部都尉臨海為東部都尉

### 獻帝建安初立三縣仍屬會稽南部都尉

分候官之北鄉置建安南平漢興三縣建安即今本府南平即今延平漢興即今浦城

建寧府志卷之二

二

葉受三頁六十八

建安八年賀齊進兵建安立都尉府

先是王朗奔東冶候官長商升為朗起兵孫策遣永寧長韓晏領南部都尉將兵討升以齊為求寧長晏敗齊代晏領都尉事候官與建安漢興南平復亂齊進兵建安立都尉府

三國吳

景帝永安三年以會稽南部為建安郡領縣十

是年析建安之桐鄉置建平縣改都尉曰太守領建安建平吳興東平將樂昭武綏安南平候官東安十縣仍治建安。建平即建陽吳興即漢興東平未詳將樂析建安校鄉置昭武即邵武析建安置綏安析建安校鄉西偏地置即今泰寧建寧二縣東安即今同安南安二縣地

建寧府志卷之二

三

三百三十四篇刊

晉

惠帝屬江州領縣七

先是武帝太康三年析候官東安置晉安郡惠帝元康元年以屬江州領建安東平吳興建陽將樂邵武延平七縣。江州即今江西之九江府晉安即今福州迤南四府

江左省延平東平二

本志云江左不言何代方輿勝覽謂宋明帝廢延平二縣之省疑即此時

宋

高祖仍屬江州

文帝元嘉中無有綏城沙村二縣

析邵武將樂地置沙村一曰沙縣

陳

武帝永定初屬閩州後屬豐州

豐州即今江西之撫州

隋

高祖開皇九年郡廢為縣屬泉州

文帝大業初屬閩州三年屬建安郡

建寧府志卷之一

四

三百五

是年析候官地置閩縣并建安南安龍溪皆屬焉治閩縣

唐

高祖武德四年改建州改太守為刺史

舊志云是年移州治於建安領縣六尋為妖賊武遇所陷五年刺史謝元治討之州復閩縣仍屬復置唐興建陽將樂綏城并建安凡六縣○唐興即吳興

六年析閩縣置泉州建州領縣如故

七年領縣七

邵武來屬

八年領縣六屬泉州都督府

省建陽  
入建安

太宗貞觀三年領縣四

省綏城入邵武按八年領縣六今既省綏城入邵武當云領縣五而云四者疑沙村與綏城並置前此未省而下文乃云復置沙縣恐此時與綏城並在所省

高宗永徽六年領縣五

復置  
沙縣

中宗嗣聖五年領縣六

《建寧府志卷之一

五

陳金節言

復置  
建陽

睿宗景雲二年屬閩州都督府

玄宗天寶元年隸長樂郡復改建安郡隸江南東

道採訪使

改唐興為  
浦城縣

肅宗乾元元年復為建州隸福州都督府

上元元年屬福州節度

代宗大曆六年隸福州都團練觀察置使

十二年領縣五

割沙縣屬汀州

僖宗乾符五年黃巢毀州治州人陳巖率鄉兵破

之

中和四年陳巖為觀察使鎮福州表郡人熊博

為刺史寓治建陽

昭宗景福三年建州刺史徐歸範叛附于王朝

潮閩王審知兄也

五代

晉高祖天福六年以建州為鎮安軍王延政為節

度使封富沙王後改鎮武立温嶺松源關隸三

鎮

天福八年延政以建州建國稱殷改元天德

延政審知子俗謂王十三郎

南唐景保大四年兵圍建州拔其地遷延政之族

于金陵州改為永安軍尋改忠義軍領縣八

升歸化場為歸化縣永安場  
為建寧縣松源鎮為松源縣

宋

太祖開寶八年南唐平復以其地為州

改松源為松溪縣

太宗太平興國三年屬兩浙西南路

通志云屬威武軍

五年領縣四

析將樂屬南劍州升邵武為軍而以歸化縣建寧屬焉

雍熙二年改屬福建路

建寧府志卷之一

七

崇禎刊

拱端元年升建寧軍節度

淳化五年領縣五

升崇安場為崇安縣

貞宗咸平三年領縣六

升開隸為關隸縣即今政和縣

英宗治平三年領縣七

析建安建陽浦城三縣地置甌寧縣

神宗熙寧三年領縣六

省甌寧縣

哲宗元祐四年領七

析建安地之半復置甌寧而建陽浦城之地不復與焉

高宗建炎二年州卒葉儂叛知州事方承移寓建

陽

先是建炎元年建州軍校張員等作亂執守臣張動轉運使毛奎為所殺判官曹仔嬰城自守二年轉運判官謝如意執張員等六人誅之是年六月建州卒葉儂等作亂寇福州陷七日入寧德縣復還建州上命御營中軍統制張俊同兩浙提點刑獄趙哲率兵討之大破儂兵於建

建寧府志卷之一

八

兼惟列三百字

州城下儂遜而降復謀叛尋擒斬之州始復

四年御營前軍將楊勅叛焚建州都統制劉光

世招安之

七月建州范汝為作亂知州事劉子翼移寓崇

安

宋史云范汝為作亂命統制李捧捕之復命福建安撫使程邁會兵討之捧擊汝為于建州官軍皆潰捧遜去十月遣前御史臺檢法官謝嚮招汝為十月復命神武副軍都統制辛企宗討之十二月汝為降詔補民兵統領紹興元年正月嚮率汝為討平建陽賊劉時舉二月以企宗



為福建制置使詔企宗及嚮罷遣汝為兵汝為  
不聽命六月崇安民廖公昭合汝為餘黨熊志  
寧作亂既散志寧復與建陽民丁朝佐合兵陷  
二縣八月移軍福州討志寧及胡江等諸賊尋  
遣御史胡世將督捕十月汝為復叛入建州守  
臣王浚民棄城走企宗退屯福州汝為犯邵武  
守臣吳必明統制李山率兵拒之衆潰退保光  
澤縣十一月以孟庾為福建江西荆湖宣撫使  
神武右軍都統制韓世副之是月汝為犯光澤  
李山走信州十二月汝為遣葉澈寇南劍州守  
臣張覺拒戰大破之企宗仍罷遣三官率兵副  
軍前自効二年正月世忠兵至建州直抵鳳凰  
山五月破之汝為自焚死斬其二弟及附賊者  
餘黨悉平世忠初欲盡誅建民李綱在福建馳  
至救土之  
建民以全

紹興三十二年升為建寧府

附錄張棟記

紹興六年今上皇帝始封建國公三十年復自  
普安郡王進封建王又二年立為皇太子遂即  
皇帝位仰惟太上皇帝憂勤萬幾三十有六載  
簡自聖衷傳位皇帝父子堯舜亘古所無而建  
實分茅賜履之地於是父老權欣鼓舞合詞言  
曰吾州雖鄙然辱為皇帝藩國者再非特一時  
之幸實萬世無疆之休是宜有所旌異以別於  
他郡乃以免解進士游克成等伏請于朝詔下  
本州討論而敷文閣待制知州軍事臣陳正同  
歷叙祖宗以來故實以聞皇帝可其奏遂以給  
事中臣金安節等議升為建寧府臣正同率府  
之官吏與其士庶西嚮再拜受賜大書立額於  
府治之門遠邇通民大和會歌頌之聲不絕乎道

於乎盛哉謹按圖經建為古閩越地漢建安中  
分東侯官立建安郡唐武德四年始置建州其  
後或改為郡或復為州本朝端拱元年陞為建  
寧軍節度惟州東一里有山曰白鶴先是望氣  
者云此山有王氣遂發工斷之朝鑿暮合至是  
始驗云皇帝即位前一月以故歲少歉新穀未  
成民少艱食群不逞因之四起剽掠邦人慄慄  
意必有曩時大盜之變然不十日州遣吏喻以  
禍福皆聽命散去後一月大旱閱四十日始雨  
農已絕望而苗之稿者愈秀發堅好遂大有年  
州貢士于禮部比他州為最而奏名者率不登  
十人今歲乃三十有一人得非地既發祥天亦  
降瑞故民心大華士風復振皆皇帝盛德之所  
感與此豈偶然也耶雖然天子以四海為家不  
當獨私其藩國而高帝之沛文帝之代過之輒  
留復其租倦倦之心久而不替則此邦後皇帝

建寧府志卷之十

十

四

之賜亦宜矣若高帝之歌大風文帝之擊匈奴  
功成事定傳之萬代以為美談而皇帝神聖英  
武視夷狄為不足平其功烈將與二帝並驅而  
爭先潛德升聞自此邦始其可不記其本末以  
詔求久為邦人之榮耀乎於是乎記

德祐二年元福建宣慰使行征南都元帥唆都  
遣招討使百家奴丁廣取建寧

元

世祖元初隸杭州

十五年改建寧路隸福州行中書省置錄事司

元史作二十六年

十七年改建寧路總管府隸福建宣慰

順帝至正二十二年立建寧分省尋據於陳有定

分省廢元史作十八年

國朝

洪武元年有定平復為建寧府屬福建布政司

罷錄事司領縣仍舊置福建行都指揮使司又

置建寧左右中三衛各領左右中前後五所俱

建寧府志卷之二

十一

陸豹刊二百三十六

治于此中衛年徙太

景泰八年領縣八增置壽寧縣

縣治

建安本候官北鄉地漢建安初析置以年號為縣名

兼轄今建陽甌寧將樂泰寧諸縣之地十年析

置之桐鄉置建平縣吳永安三年又析其地為

將樂昭武綏安三縣唐屬建州南唐屬永安軍

尋屬忠義軍宋屬建寧治平三年又析縣之西

北境十二里置甌寧縣惟統東南隅十三里地  
元屬建寧路

國朝屬建寧府縣附廓編三坊四鄉十三里

甌寧本建安縣九里三者并浦城建陽二縣地  
宋治平三年析置熙寧三年省元祐四年復以  
建安西北十二里為之分建安之半建陽浦城  
之地不與元因之

國朝仍舊縣附廓編三坊四鄉十二里

建寧府志卷之一 十二

浦城亦候官北鄉地漢建安中析置漢興以國號名

吳永安三年改興隋開皇九年省入建安縣唐

武德四年復置改唐興天授末通志云嗣聖六年

改武寧神龍元年復名天寶元年改載興後唐

同光中更名浦城舊志云東越王築城臨浦因名宋德祐初分

置忠安軍元復為浦城

國朝因之成化十三年調建寧右衛前千戶所守備

於此編四隅十鄉三十里

建陽本建安桐鄉地漢建安十年孫策遣賀齊討上饒分桐鄉以益之立建平晉大元中改建陽隋開皇九年省入建安唐武德四年復置八年又省入建安垂拱四年通志云嗣聖五年復置五代閩以縣之西北地立溫嶺鎮後改為崇安場宋淳化五年陞為縣始自黃亭分界景定間改嘉禾有嘉禾產于石塘里故名元復今名

國朝因之

編一坊五鄉十八里

建寧府志卷之一

十三

陸馬三百八十八

松溪本吳越處州東平鄉五代時閩立為松源

鎮今東飯伏是其地

南唐保太九年陞為縣宋開寶八

年改今名

縣南有溪發自浙江處州府慶元縣松源鄉溪南岸有松故名

至道

二年析建安之杉溪興唐并浦城之上元三里益之元仍其舊

國朝因之

編三鄉七里

崇安本建陽西北地五代時閩析置溫嶺鎮屬建陽縣南唐改崇安場宋淳化五年陞為縣始

自黃亭分界元仍其舊

國朝因之編八都八鄉一十九里

政和本福州寧德縣地王潮析置關隸鎮宋咸

平三年陞為縣析建安之東平高宅長城感化

東衢五里地益之政和五年更名以年號故名元仍

其舊

國朝因之編一坊八里

壽寧本政和之東北里及福安縣之十一等都

《建寧府志卷之一

十四

陸馬三百七本

地

國朝景泰六年析置編二十

先是境有大寶坑銀場每為溫處流民盜採并肆剽掠景泰初洞蠻鄭懷冒擁眾嘯聚于官臺山作亂。朝命都御史劉廣衡發兵勦之劉檄按察僉事沈訥為前部訥字文敏號網庵為蘇之崑山人素有才畧因從間道入其阻躬自搏戰身被二矢一鎗奮鬪益急賊不能支遂悉藏焉復與劉謀曰此賊負固百餘年矣民亦習亂今幸覆其巢穴若不臨之以官能保其無後憂乎劉是之建白于。朝縣始初置沈復專督其事區畫經理咸適厥宜民感德為立報功祠

建寧府志卷之一終